


260.87
36
8



黃廷三



黃岡縣志卷之十

知黃岡縣事宛平俞昌烈



人物志

忠義

乾坤定位綱常繫焉爾而當艱難檉杙之秋微二三忠臣義士出萬死不顧一生之計以扶之乾坤或幾乎息矣余竊有感焉首陽高節在當時幾何不爲頑民唐張許成就如彼卓卓而異議者猶隨其後非賴篤論君子表而出之又何以扶忠義而植綱常前志於成仁之烈每補史所未備其幸不卽捐糜志同道同亦並列焉可

黃岡縣志

卷之十

忠義

一

謂懃懃懇懇矣時平無事可見此意固凜凜也

元

吳汝字國棟生而靈異膂力絕人其先自饒籍黃三世爲懷遠將軍父賢襲職鎮陽邏至正十四年劉福通作亂號紅巾據鄂州賢與其弟貴及汝討賊克復者再有大功賢卒汝累遷行省平章左丞鎮邾值大水堤盡決汝以巨艦載石塞之全活甚眾是時徐壽輝方破鄂州所至郡縣皆陷汝起兵大敗之盡復故地威震淮楚旣而壽輝潛師襲鄂州城陷汝率十餘騎渡江欲更舉不克而死汝旣死貴遂歸隱不知所終汝部將黃榮沈權等

歸於明後戰鄱陽且急見巨人紅袍馳白馬從空中來
則汝也遂大勝因封護國忠臣顯靈王邾人以汝數有
功亦祀之

明

奚世亮字明仲父樸嘉靖辛卯舉人知富陽縣有清操世
亮嘉靖丁未進士授南戶部主事推稅以廉著累官刑
部郎出知思南府左遷高郵州同知先是世亮餉楊繼
盛於西市嚴嵩銜之至是削秩四十二年倭犯閩浙乃
起廢以爲福建延平府同知時興化缺守倭寇且亟人
多計避世亮曰承平受爵臨變若避非忠也卽往率士

黃岡縣志

卷之十

忠義

二

卒登城守身冒矢石踰月總兵劉顯遣卒齎書越中衣
刺天兵二字賊殺之衣其衣給守者得入城陷世亮力
戰死之賊平乃得遺骸於旗亭事聞贈福建右參議賜
祭葬祀鄉賢廕從子繼善授詹事府錄事妻王氏以節
旌事詳明史

康良臣嘉靖間以掾尉定海率義兵與倭戰斬首三十餘
級身受重創遂戰死手戈馬上不墜事聞廢一子入監
樊玉衡字以齊家世孝友萬曆癸未進士由廣信府推官
徵授御史性強直敢任屢劾權貴薦揚忠良時儲位未
定疏請皇長子出閣視學正元良之位越三年有二王

並封之旨玉衡復上疏語益激切與執政忤謫無爲
判稍遷全椒知縣禮者碩表先賢因俗便民剔除
二十六
年光宗卽位起南刑部主事以老辭疏陳親賢遠奸十
事尋命以太常少卿致仕著有全邑志林卒於家詳具
藝文樊良樞傳子鼎遇維甫維城俱有傳崇祀鄉賢
孫大祚萬曆乙酉舉人累官淮安府同知有惠政遷易州
知州時稅監王虎以開礦駐橫嶺肆爲民害大祚力與
之抗不少屈虎嫌甚尋虎以橫恣激廣昌民變乃誣劾

大祚阻撓礦稅坐貶後礦稅罷以楚雄推官起用未仕
卒贈按察司僉事旌其忠節事見明史崇祀鄉賢

韋宗孝字養玉事母孝母常臥病咳血宗孝必以手承之
母卒刻木像朝夕奉祀道途飲食必先獻然後敢嘗萬
曆時授雲南嵩明州吏目值武定賊鳳騰霄陷嵩明出
禦而敗被執不屈死闔門殉之僅遺一子蜀麟有老僕
韋全自棄其子而匿之缺爨得免事聞賜祭葬贈本州

同知廕子蜀麟入國學後官南京虎賁衛事載明史

王追皋字執之尙書少保廷瞻長孫也事繼母以孝聞少
能爲詩文科試副榜者三乃龔廕累遷南戶部郎天啓

二年出知貴州安順府是時安邦彥爲亂圍貴陽且急
安順道絕追皋曰疆場急豈得安寢遂傾家貲募壯士
以行巡撫王三善見追皋奇偉多謀略甚重之委署平
越不逾月轉米芻七十萬激勵將士一戰圍解署平壩
兵備副使督漢土步騎十五萬人討安酋自普定抵清
河口十七戰皆捷以勞病三善問之對曰不負國不負
知己遂卒子一翥陳其狀贈太僕卿廕一子入國學
王一桂字千秋由舉人累官戶部主事崇禎九年督餉昌
平

大清兵入喜峰口御史王肇坤拒戰死由閒道至昌平戶部

主事趙悅署州事王禹佐分門守一桂以城南最衝獨
往時降卒內應遂破西城肇坤被矢死一桂及悅禹佐
皆死之先是一桂聞警呼合家速死於是妻姚氏妾邱
氏偕子女二十七人投井死唯十歲兒與一婢潛土穴
逸去事聞贈太僕少卿賜葬祭廕子事載明史

周之訓字日臺立身方嚴好學洽聞萬厯癸丑進士授戶
部主事督權淮關累官浙江按察使所至皆有政績坐
事罷起山東參議備兵萊海移濟南分巡副使崇禎十
一年冬十二月

大清兵自畿輔南下是時巡撫移鎮德州濟南空虛止鄉兵

五百萊州援兵七百勢弱不能支而督師中官大將皆擁重兵觀望不救之訓與右布政使張秉文等分門守糧盡兵民思潰諸官集計事之訓按劍曰今日之事與諸公守此土死北面拜哭遂乘城二日城破秉文戰死之訓死於南城上闔門皆死之壬午贈光祿卿諡忠烈賜祭葬建特祠詳具藝文劉淳驥周中憲傳崇祀鄉賢周啓元字善長父有爲寧國知縣啓元年十二侍父病晝夜不輟父卒哭輒欲絕歸次蕪湖舟覆啓元抱櫬浮水出乃還葬焉事母以孝聞天啓丁卯舉於鄉補公安教諭教諸生以德義文章擢山東高苑知縣兼攝樂安臨

胸歲凶民亂咸綏輯之以才能著

大清兵東下破高苑啓元朝衣握三縣印坐堂上死之贈山東按察司僉事廕子入監事載明史

程之奇歲貢生官荆門州訓導崇禎十五年十二月李自成攻荆門之奇與學正張郊芳盟諸生於大成殿佐知州盧學古守之環攻四日援絕城陷不屈死詳明史

樊維城字紫蓋太常玉衡季子也萬厯己未進士授海鹽知縣以清能稱詳浙江名宦志天啓七年維城以最擢禮部主事尋坐事謫上林苑典簿崇禎元年維城抗疏言魏黨良卿良棟等冒請封爵當誅又言忠賢積財半

盜內帑請籍還太府可裕九邊數歲之餉因請褒恤楊
漣萬燦等一十四人召還賀逢聖文震孟孫必顯等三
十二人亟正張體乾許顯純楊寰等罪是月又言崔呈
秀雖死宜加刑及五虎五彪之罪又斥吏科陳爾翼緝
東林遺孽之非乞釋御史方震孺罪並可其奏遷戶部
主事洵擢福寧兵備副使於是海寇斂息八年罷歸力
學著書做衣徒步陶然自得也十六年春張獻忠圍黃
州維城率眾拒之三月城陷抗聲罵賊洞胸而死從子
諸生齊華殉之維城著有皇極敷言毛詩大成周禮雜
錄諸書紫巖集載明史孫聖和諸生敦行誼

曹士謨字獻虞十歲就童子試府縣皆首拔督學鄒愚谷
試之曰異才也仍以冠軍旣長學益富知縣茅瑞徵異
其才與呂元音同修邑志今所傳茅志是也天啓間以
歲貢除隨州訓導教諸生有法三年告歸獻賊之亂士
謨與樊維城倡率勇壯守黃州城陷死之

郭以重世爲黃州衛指揮聞獻賊攻黃州乃率妻子赴難
未至而城陷其妻不欲入以重曰朝廷與我十三世金
紫豈不能易一死軀乎言則殺汝矣遂行遇賊露刃脅
之去以重給之曰是不難彼抱小兒者吾妻也汝爲我
殺之則無累矣賊果殺之以重奪賊刀殺一賊遂赴水

死事載明史

王家錄字愧修天啓辛酉舉人累官刑部郎有請恤刑熱
審諸疏改戶部員外郎督餉榆林李自成方據西安遣
其將陷延安綏德將及榆林時家錄已擢關南兵備僉
事未行曰撫軍方罷總兵官已遁吾不可去當守此土
佩利刀誓死戰也遂與兵備副使都任率眾協守崇禎
十六年十一月圍急城無完堞家錄令男子皆乘城婦
人運水灌城冰厚數寸賊穿地穴藥火燒之賊勢稍卻
會寧夏諸賊合攻外援不至城陷都任死之家錄引佩
刀自刎未絕以手蘸頸血書忠義二字乃死屍六日不

黃岡縣志

卷之十

忠義

七

僵賊眾見之有驚拜者藁葬城南後其子源發源復得
其屍面如生以櫬歸葬事聞贈光祿少卿賜祭葬廕子
詳明史

方堯相字紹虞貢生官成都同知明末獻賊寇成都堯相
佐巡撫龍文光協守監紀軍事兵食絕泣請於蜀王不
應怒投於池以救免明日城陷不屈遂殺於萬里橋下
事載明史

吳思溫字揚休萬曆甲午舉人由均州學正擢雲南順州
知州苗蠻犯順撫循有方累官廣西布政使致仕歸寓
武昌值獻賊薄城率兵守保安門抗節而死葦席裹屍

數月不變其妾田氏子諸生江英子婦游氏及兩女俱投井死

余士瑋字季美崇禎丁丑進士制行端方尺寸不苟授九江府推官左良玉兵叛士瑋抗義入其營罵賊賊重其名舍之復自悲號十日卒於廬山之麓張家山載九江

府志

方應星字文卿崇禎丙子武舉巡撫宋一鶴擢爲都司授兵三百防守遠安闖賊據襄陽招降不從遣賊將數萬騎攻城三日不能下叛卒開門應之城陷應星被執不屈罵賊死

黃岡縣志

卷之十

忠義

八

李士奇明建文時詔錄開國功臣崇山侯濠州李新子襲黃州衛指揮使和勲七世孫也占籍於黃由指揮使陞鄖襄行都司崇禎十五年致仕十六年獻賊破黃州率家眾奮身挾弓矢禦之矢盡被賊執脅降不屈罵賊死長子逢春

國朝順治九年授衛千總領運次子逢年諸生孫高桐高梓諸生高楠副榜高松進士

朱寵黃州衛千戶崇禎癸未奉憲司王瓚調上游禦流寇三月獻忠破黃州五月陷武昌隨憲司兵回黃得義兵助復之次年聞國變仰藥死

馬士英字子才自幼尙氣節崇禎時流賊肆掠英團練鄉勇阻潭水立寨保聚十餘年巡撫宋一鶴親臨獎慰題加遊擊銜癸未三月獻賊犯境有促之避去者英不聽時斬弁夏大武黃推官許士奇降賊與士英素契扣寨再三招諭英峻拒之曰吾終不負宋公遂率衆與戰竟日殺賊百餘力盡死親丁五十一口殉之總鎮毛顯文踵門弔祭邑紳王明可等呈請按院旌表祠祀明旋亡事寢

於斯昌字文言崇禎己卯舉人慷慨好節義張獻忠聞其名索之急做衣草笠走得免唐王時官兵部主事與萬

元吉同守贛州

大清兵破城斯昌死之乾隆年間

賜謚烈愍

國朝

汪基遠字星伯順治己丑進士授東鄉知縣招集流移撫字多方民懷愛戴時金聲桓叛後所在嘯聚土寇吳君寵攻東鄉基遠督兵出戰死之後令曹可大狀其事

賜祭葬由部頒發

諭祭文

特贈按察司僉事廕一子載江西名宦志子惟錡由廕累官

霸州知州弟基遂諸生東鄉之役基遂獨力保全及惟
錡卒於官爲經其家以義稱乾隆六十年奉

旨查明各殉難官員其時已

追贈廕子者子孫予以世襲恩騎尉罔替基遠嫡傳六世孫
封渭承襲照例作文生鄉試中嘉慶癸酉舉人道光癸
未進士現任德州知州

孫如芝字素公與兄啓選俱負才名如芝工古文詩詞順
治辛卯舉人授四川筠連知縣城中僅七十餘戶如芝
悉心招徠創禮殿建城垣逾年大治當事奇其才修蜀
志論列皆出其手丁內艱歸次江安值吳逆反賊帥強

黃岡縣志

卷之十

忠義

十

受僞職拒不受自縊死乾隆六十年奉

旨查其後裔給予世襲恩騎尉罔替道光十一年其裔孫廣
墉詳請承襲

吳之蘭字國禮黃州協把總有材勇康熙十三年冬山賊
何士榮亂之蘭從郡守于成龍進討力戰而死士人哀
其忠爲立祠以祀之事見于清端政書

劉志高庶安鄉人康熙十五年以守備管遊擊事從軍戰
死未詳何處是秋

賜祭葬有

諭祭文

陶之駿廣東茂名縣丞康熙十九年粵賊猖獗之駿領兵
追賊至蕉林會武弁逃去之駿毅然直前沒於賊事
聞褒恤廕一子思哲入監乾隆六十年奉

旨查其後裔給予世襲恩騎尉罔替至道光二十八年後裔

士貞詳請承襲

以上
忠臣

明

吳璋倜儻負氣節初爲掾嘉靖時大禮議起諸臣忤旨譴
謫纍纍璋曰死忠孝者分也我其爲陳東歐陽澈乎遂
徒步詣闕上書救楊廷和等復力持諸臣前議詞甚激
烈下錦衣獄杖八十遂瘐死

忠義

黃岡縣志

卷之十

十

易道暹字曦侯邑諸生少尙氣節好讀書積卷滿家其自
著有十五朝文獻四書易傳內外集詩徵若干卷明季
乙亥流賊亂將及黃州道暹惜所積書與已著書多徘徊
不忍棄賊至長子爲珣奉母走青峯巖道暹攜幼子
爲璉擔囊而行遇賊索其囊則盡書也賊問之且識其
名道暹曰若旣知我當聽我言慎毋殺人焚屋賊曰身
且不保尙爲他人言道暹怒厲聲叱賊賊欲兵之爲璉
請代賊並殺之未幾爲珣亦死詳明史其後監軍道王
瓚沔陽知州章曠武昌生員陳天一白雲寨長易道三
皆起兵討張獻忠復斬黃漢陽諸州縣道三道暹之從

弟也事見明史

馮雲路字漸卿邑諸生好學勵行年三十棄舉子業從故相賀逢聖講學寓居武昌著書數百卷巡按御史林鳴球薦其賢並上所著書不用崇禎癸未獻賊攻武昌雲路貽書逢聖曰在內以寧湖爲止水在外以漢江爲汨羅寧湖雲路讀書處也城陷赴寧湖或阻之曰我生唯讀忠孝書未讀降賊書也遂懷所著藏易投寧湖以死事載明史雲路子永明諸生痛父之死哀毀不欲生終身不入城市

熊甯字渭公諸生移居武昌喜邵子皇極書頗言未來事

黃岡縣志

卷之十

忠義

三

崇禎癸未元日盡以所著書付其弟雲霽以歸曰善藏之獻賊將至乃貽書雲路曰丈夫當於節義中尋實地明日見我某樹下城陷甯投荷池死卽所言樹下也著有性理格言大易參圖書懸象春秋主左十三經注疏評略立齋古今文諸書事載明史

汪陞延字亦嘗一名三奇諸生窮經明理學所注五經名五經成又著離騷注舟略二十一史兵法修楚文獻錄諸書寓居武昌時左良玉撤武昌兵自護東去守兵半老弱器械倉庫且盡張獻忠方陷蘄黃聞之卽趨武昌守官及故相賀逢聖議守諸生馮雲路諸人從之以陞

延協守東門括城中宗室及民壯爲二營又榜募勇士
守城號新營新營者卽賊之間諜也守三日所殺甚多
賊不能入而監軍參政王揚基率其部下千人渡江去
新營人遂開文昌保安二門迎賊賊入賀逢聖以下皆
死之陸延呼曰我黃岡汪陸延殺賊者我也賊執之付
一紅營賊拘之示以刃且勸之降不屈謂其子部孫曰
我生平力學在今日汝有母勿傷也賊投之湖湖水及
肩陸延坐而死明日部孫負屍出覆以土賊去始斂貌
如生見明史

王子堅武舉明末寇警與力士余季貞守城衝鋒破敵殺

黃岡縣志

卷之十

忠義

三

三

賊無算城陷猶奮力巷戰賊眾叢矛刺之被執齊聲罵
賊賊怒且如其勇也皆磔之省志作王子見

史子見諸生尙氣節明末獻賊僞將毛主席辛家衝獵
財招亡肆虐無狀子見殺之獻忠聲言三日不獲子見
屠其鄉子見挺身往賊磔之皮肉且盡猶骨立不僵鎖
其頸於彰孝坊夜分脫鎖走臨湖寺明日賊索獲復斫
其首至今辛家衝廟祀之

戴瑾字可懷諸生膂力絕人善用大刀馬上輪轉如飛聚
義勇守馬鞍山獻賊破黃州將北掠瑾伏狹路邀之殺
賊前驅千餘人獻忠至瑾射之中肩賊眾驟集訝其勇

欲生致之圍數重瑾登樓飛瓦擲賊賊斃瑾亦死
鄧雲程字扶風諸生父士駿以孝友稱雲程狀貌雄偉有
膽略赫然武勇以忠義自矢壬午張獻忠犯黃州守令
召雲程議守雲程曰城頽人散徵發科派皆不及獨有
不肖一軀可塞餓虎之蹊耳郡守壯之然畏敵眾執其
手欲有言雲程揮手去結襦持鐵鞭長五尺許縋城下
獨當賊衝三晝夜賊遁及聞闖賊之變號吼噴血數斗
遂狂走莫知所之後其子之愈聞其卒於洛陽之橫谿
乃歸窆焉

操志述字振翼性仁厚負才幹嘗寒夜家人獲偷者方求

火志述密縱之獻賊攻武昌糧餉且盡志述數見禮於
楚王乃亟言發帑藏以犒守卒不聽志述聞城破遂赴
難長子日元請從許之次子暄亦欲往止之曰宗祀不
可絕汝歸撫兩弟可也遂同長子赴水死

馮承遇承選明末乙亥遇賊被執賊偉其貌脅之去大罵
不從賊怒俱殺之同時以罵賊死者有蕭繼昇吳衍周
吳應周諸人先是繼昇結寨禦賊方略甚具後眾寡不
敵乃獨持短鎗鏖殺三賊死之

王躬靖諸生年甫冠尙氣節善射流賊之亂保障山砦屢
戰輒勝活人無算獻賊聞其名招之不從困於迴龍山

罵賊不屈死

曹大震字子旦諸生孝子大聲弟也獻賊之亂震爲所執罵賊不屈而死孫一嵩字中巒選貢

萬里春字蘇伯崇禎壬午副榜倜儻負氣誼以勳業自許時寇氛熾甚其父母方避兵武昌癸未夏望火光燭天驚曰會城破矣乃夜走輾轉鋒鏑中迎父母歸居武湖與弟爾昌審地勢築堤障湖水環二百里經冬不涸爲守禦策甚備賊渠據武昌以僞職招誘亡命乘閒竊發里春乃立團長朔望申明約束人知自凜以故他方糜爛而一鄉安堵歿後鄉人祠祀之年三十九卒

鴨蛋洲殉難二十八人崇禎十六年夏四月張獻忠破鴨

蛋洲舉人魏應罷於斯行生員陳鴻劉紹熙鄭士杰帥有功國學生韋秉國鄭儼林秀芳鄭長裕汪熯南李若梅汪國衛劉應權韋石桂劉子俊杜紀劉相國陳鑛劉子傅劉子儼鄭士俊黃衡方珪張鴻儒張鴻仁劉紹伊劉紹賢諸人毅然不屈罵賊而死修撰劉子壯爲文祭之紹熙子壯之從父博學好義子壯師事之

樊維章字闇生諸生訓導玉瑤子英果有智略明季羣盜起憤曰丈夫不得乘權建功緩靖四海亦當度地自守保此一方民遂率子弟立寨桃花洞團聚鄉勇流賊不

敢犯及獻賊陷黃守愈力賊晝夜攻破之生執章誘降
不屈被殺弟諸生維默維清亦罵賊死清死時血高丈
餘濺賊面默首在地猶僵行手斃人乃仆闔門死者百
餘人

國朝

孫希伸字旭如明季副榜博學能文章負性敦樸仗義輕
利先是鄉人經流賊蹂躪婦女多被擄掠希伸以計致
歸者不下數十家及後獻賊所過降者皆屠希伸率居
民守劉婆巖事急議者欲降希伸獨持不可極力拒之
遂得保全子顯宗字方水諸生好義有父風

黃岡縣志

卷之十

忠義

六

王象虞性抗直好義有智略順治初土寇起清軍府選爲
山砦練長象虞提義勇千餘人所向克捷時有紙砦鐵
人練長王之謠子友柏化龍俱諸生以學行稱

張本恕字全淑邑諸生有才略順治十年平石人寨山賊
有功有司使爲但店鄉勇練長康熙十三年羅山賊周
鐵爪潛入麻城東山白水畝聚衆謀逆邑石馬衝何士
榮自長沙歸以僞劄煽衆附之於是知府于成龍率師
使本恕督其堡烟甲防禦賊不得入境因陳山中形勢
請給發兵二百防守黃土嶺隘口成龍從之士榮及鐵
爪皆就擒何族懼株累以本恕言盡釋其疑是役糧草

區置不微里甲及鄉勇旗鼓之設本恕參畫爲多賊平將上其功謝病不起成龍爲表其門見于清端政書張尙聖字文先康熙壬子武舉有才勇十三年何士榮之亂尙聖受知府于成龍令與千總王茂昇把總羅登雲率鄉兵太平堡余君榮得勝堡高巨卿清淨堡舒楚王雲龍堡王克明等凡四百人先駐黃岡廟賊衆突出戰於黃土地尙聖冒矢石勇敢爭先賊勢稍卻於是諸將分道進擊尙聖由石山東越崇嶺數里與眾軍合大敗之殺傷無算士榮挾矛走陷泥中獲之遂乘勝破石壁餘黨悉平後尙聖成武進士官守備其同時著績者有

貢生龔相旦生員吳之鄒曹洪仁官純恭靖天德諸人扶病籌畫者則程鎮邦也見于清端政書

胡珠字山佃明末諸生好古力學尙節義以走馬試劍自喜父早卒事祖來通以孝聞獻賊之亂珠獻策楚撫宋一鶴時躋其言而不能用楚竟以破左良玉鎮武昌聞其名辟之不就遂避居岳州平江礮溪躬耕自給吳三桂反迫致之珠走避瀕死者數得免亂平反其居屋已灰矣而故人所寄白金三千擲野塘中尙在覓其人還之康熙二十三年聘修楚志後客死於岳著有無悶園詩文一百卷孫作舟雍正癸卯舉人

胡來寅字協恭善屬文有勇力康熙初東山賊劫邨落寅
出穀五百爲糧率鄉勇奮力捍禦被執不屈賊械繫之
夜乘間遁路遇官軍身先引導遂搗賊巢賊平郡守于
成龍酬以金帛不受

以上
義士

補遺

明

蔡馨明字克薦天啓丁卯舉人官眉州知州流寇至守禦力竭題詩大雅門闔門殉節死

國朝

鄒元熊有勇力善騎射由行伍拔補道士派營經制外委巡緝江甯晝夜不懈盜賊欲逃嘉慶元年奉調征勦襄陽教匪時著戰功五年七月大兵擊匪於鄖屬花果園熊當先陷陣沒於軍夫帥以聞奉

旨給與雲騎尉世職以其嗣子觀光承襲觀光卒子承勳襲

黃岡縣志

卷之十

職

十五

惜不永年

孝友

孝友本行也書曰立愛自親立敬自長也亦庸行也孟子曰孩提知愛及長知敬也自人心陷溺鮮葆厥初或乃德色諄語矣或乃相怨相猶矣可勝慨哉然人或不愛其親未有不愛愛其親者之人或不敬其長未有不敬敬其長者之人又見真心不可泯沒特無有以發之者也邑中惟孝友于未易更僕數父兄之教先鄉鄰之俗美子若弟尙其遵而循之

南宋

董陽西陽縣人三世同居外無異門內無異烟南豫州刺

黃岡縣志

卷之十

孝友

辛

史舉以聞詔榜門曰篤行董氏之間蠲一門租布

見南史孝

義傳又宋書云西陽董陽五世同財爲鄉邑所美與南史稍異並存以備參考

元

林鳳陽事母孝宅失火獨負母出家貲盡棄不顧有過客憐之遺以金謝不受治春秋不第奉母屏跡林泉吟咏

自適

明

王文奎字時曜父思旻別有傳文奎性篤孝七八歲時連失怙恃鞠於庶母李氏奎恨弗逮養事李如母奉諸兄如事父然撫諸猶子皆與已出無異又性好施予歲積

粟數千斛以緩急族鄰年豐減息年凶則並棄之又置祀產以備春秋展墓之需其餘懿德芳徽難更僕數戶部尙書安陸孫公額其堂曰孝友李東陽有孝友堂詩序子濟字體民宏治壬戌進士累遷吏部驗封郎中母歿廬墓側服闋就官慙直多所建明遷河南參政聞父疾三疏乞歸養不解帶者四年父卒哀毀盡禮正德中旌表尋起四川參政不就家居明農課士置義田義館以贍族生平好經術能文章介立有特操不輕假人顏色傲蕤羸馬絕跡城市鄉人敬畏之卒祀鄉賢子廷儒廷陳廷瞻俱有傳

李文仕性至孝兄某被誣繫獄文仕代赴理死杖下周曰昂字民翹生而篤孝親卒哀毀廬墓側苦塊三年有白鳩巢其側有司以聞旌其閭

高澄字汝清讀書行義里中貧者周遺不倦大父有暴疾澄籲天請代疾以愈大母年五十目雙瞽澄日以舌舐之目復明事父母飲食必嘗而後進比卒哀毀骨立廬墓三年

劉承芳字世美少穎悟善屬文舉止冲雅父母早卒哀毀骨立事繼祖母以孝稱仲父幼孤奉事罔懈撫從弟稱友愛以歲貢授同安河訓卒祀鄉賢

唐治以掾授冠帶馴謹退讓若儒者鄰家火發舉室奔避
父柩在堂抱而哭曰吾何生爲一時左右數百家俱燬
柩堂獨存治以薰炙伏柩而死萬曆十二年詔建坊旌
之見明史坊後圯康熙末知縣鍾葦修復

聶一正儒士有孝行舊志稱其久入憲綱待旌

陳常智性孝友兄常仁嘉靖間遇變坐戍常智曰予有子
兄未有出請戍所請代同戍者白其事尹義之兄得釋
代戍一年卒事聞乃歸葬焉

詹景麟號南山子事父母能色養父母卒廬墓蕭山下攀
樹號泣行道傷之批閱書史窮年著述時稱楚黃博洽

黃岡縣志

卷之十

孝友

三

者必首推之年三十餘卒

官如臯字直卿諸生事親以孝聞家貧力學以誠恕自勵
或面折人過久之人以爲愛我也學者多師之稱曰古
愚先生祀鄉賢子應震有傳

王廷槐字稚占麟子嘉靖戊子舉人麟早卒終身泣慕事
母孝養備至視身澡潔重名義嗜讀書不治家人產而
佐人緩急又廣收道殣瘞之歲以爲常子同道貴贈御

史祀鄉賢

樊鼎遇一名維藩字長卿由選貢授德陽知縣有善政先
是父玉衡請建儲得罪謫戍雷陽鼎遇憂慕十餘年思

一救父不可得至是以考績例得封引邵康生事願停已封代父戍疏再上不報遂去官悲鬱成疾身如琉璃澈見五內遂卒著有道林集祀鄉賢

劉瀾諸生父歿廬墓三年晨昏號泣不絕萬曆二十一年旌表

王達尊呂陽城農民母病衣不解帶三年家雖貧隨母所嗜必力致之母失明以舌舐之而愈及卒尤盡禮

易道坦字瞻明道暹兒童時父豫之病篤禱於祖割左股以進尋愈性淡泊修身立行老而彌篤鄉里稱之

嚴倫明諸生事親誠孝親歿友愛諸昆多所推讓年逾七

十始舉二子長璞嘉靖戊午舉人次珣辛酉舉人孫師範崇禎辛未進士祀思堂集謂倫孝友當食其報信然黃孝子逸其名淋頭畷人事母孝明末當事給衣巾旌之人稱爲孝子

倪士觀諸生母劉氏苦節士觀純孝萬曆時母子俱旌

張岐鳳諸生至性純篤事父靜湖母袁色養如嬰兒既喪廬墓六載曉夕哀號行人聞其聲莫不悲之御史某與之官湖以旌其孝嘗有羣虎入其徑岐鳳不爲動虎亦帖焉再宿而去山下忽出一泉衝突鳴鳴然與號泣聲相應里人異之因稱爲號泉先生欲上其事固辭乃止

士大夫多爲詩歌傳之

蕭繼元字伯陽父文憲爲酷吏所斃與弟繼茂詣闕鳴冤書不得上酷吏疑其從弟繼忠爲翼復誣以盜榜笞且死繼元曰事急矣我獨任之遂懷其狀叩閤自剄事聞下撫按問狀竟抵酷吏罪出繼忠於獄繼茂天啟甲子舉於鄉

汪世極父之渙卒於臨清舟次世極聞訃觸地幾死扶棺歸廬墓三年後歲凶賑饑全活數千人由保舉授通城教諭卒祀鄉賢子煉南別有傳

汪世植字晉卿文淵孫五歲父之沆歿生母范氏苦節撫

黃岡縣志

卷之十

孝友

十四

之六十餘年癸未獻賊破團風洲母年九十不能行植負母逃避已爲賊執欲挾之去不從遂遇害弟世柱字石卿亦篤孝友工文章

王崇擢字平衡三歲父歿奉母李氏盡孝爲人長厚謹飭童稚皆親之晚與其妻同享大耋兩受封典孫澤宏請告終養人以爲榮祀鄉賢

王同觀字養所廷瞻幼子年十三父臨歿摩頂謂之曰亢吾宗者必此子也事母董氏盡孝與兄同鼎友愛無間教十子皆以文行顯長追駿進士由戶部郎出爲真定知府有撫字鎮禦之功追騏追駉別有傳

胡心明性至孝母病篤禱於神願以身代其弟心孝復割股病尋愈心明多隱德鄉里稱曰善人

徐斐諸生獻賊陷城勒其母爲爨不屈將殺之斐願以身代不許母遇害斐遂大罵至割四肢耳鼻罵猶不絕口徐之卿諸生祖榮父言累世積善之卿事父母以孝聞父歿哀毀幾死自叩歸葬焉癸未賊陷黃人皆驚散之卿獨衰服護母棺賊憐其孝釋之平生研理著有易經微義子逢吉三歲失母友愛繼母弟年三十喪妻不再娶壽八十餘

王自誠字雲所團風市民也母病篤自誠爲嘗糞及卒痛

黃岡縣志

卷之十

孝友

三

哭死竟日乃甦縣令嘉其孝年九十三卒子田見亦有孝稱

祝邦勝字敬甫父尙仁多病邦勝日夜扶持逾久不懈一時稱爲孝子崇禎六年知府許文岐知縣吳允初皆給牌褒之

張鳳來字文字少孤祖母楊苦節教之鳳來以純孝聞一門五世同爨性坦易周急如不及嘗遠遊旅次遇賊資斧盡喪獨友人所寄百餘金猶存及還封識宛然又嘗拾道遺二百餘金還其主生平義舉多類此有司旌其門崇祀鄉賢子本忠本恕別有傳

易爲瑚字伯賜道暹長子諸生有文名暹死賊時瑚奉母
走青峰巖團練鄉勇誓殺賊報仇里人倚以生活者六
七年後卒爲賊所殺學使洪天擢以父忠子孝匾旌之
何昌祚字子安明末選貢父闕中見宦蹟傳昌祚砥礪名
行博學深於易事祖父直以孝稱時闕中宦蜀道梗故
昌祚養於家母余歿昌祚奔喪自蜀歸行峽中每值險
抱棺號哭波爲之平與弟昌祿友愛無間居鄉恂恂重
交誼賑荒瘞暴斃郡邑爲立善人碑嘗避亂英湖遇盜
劫其鄰見火光中羣盜呼曰無驚何善人後居江南
之童山

陳四維字孟達性孝友明末諸生家多藏書招延貧士兼
有謀畧流寇掠蘄黃四維集義勇全活數百人巡按御
史汪承詔優其文行請祀鄉賢

程詹父母卒每值日暮向殯側坐守之寒暑無間者七年
事其兄伯仲甚謹兄怒輒跪而謝非色解不敢去居鄉
無所憾於人者善屬文著有無居雜咏課子有家規以
子啟朱貴贈中憲大夫

方紹正字汝士父母早卒哀毀盡禮田廬美者推讓諸弟
見人急難輒捐貲救之晚以岐黃濟人以禮孝義敦
其家

陶克孝字毅士穎悟好學弱冠補諸生有文名流賊之亂所遇殺掠居民奔散克孝以母病不能行乃擁土塞戶獨依依守母側賊至擾閭里無或免者及戶而返縣毫無所犯人謂孝之報云同時昆季多以文著克俊字堯叟崇禎己卯舉人篤學力行一時重其名弟作聖研究宋儒書著有正菴文集

國朝

曹亮采字浚明性孝隨父遇賊請以身代賊感其孝釋之年十二補諸生順治初以歲薦授桂東訓導講學論文士風大振子衍諸生有學行孫夏銑舉人

黃岡縣志

卷之十

孝友

三七

張愈奎字雲衢父母年俱九十餘奎曲盡孝養後奎亦及九旬思親輒泣下里中有爭者每出一言解之皆為心服子仲經康熙丙午舉人

王躬俊諸生少事父母以孝稱兄弟五人三世同爨立義學延名師訓鄉人子弟成就甚衆時東山未靖俊糾集鄉勇籌糧餉以義稱年八十餘手不釋卷卒祀鄉賢子風采孫全才俱別有傳

劉思敬父病劇侍勤日夜手捧污穢三年衣不解帶強如蝟弗覺也父卒既殯號泣氣絕而沒此與割股者別一人

張本忠字淇思穎敏好學嘗從名儒張溥游溥亟稱之性

至孝明季廬父墓側流賊至將掘其墓冒死捍護身受
數刃哀切彌至賊釋之家貧讓諸弟日食豆粥晏如也
巡按邵炳元嘗旌以詩順治甲午舉於鄉官江陵教諭
懇誠樸直一時稱爲長者子光璧別有傳

易爲泰字開子諸生事親孝父士龍明末知大昌縣值寇
至爲泰身冒矢石以火攻退賊後告歸值獻賊破武昌
流屍蔽江而下爲泰斂之爲叢塚凡七十餘骸時兵警
又家僅中人產也平時田宅皆讓於昆季撫諸孤從子
如已出見路人貧乏者輒謀助之家白雲山羣盜過其
里呼曰小人受恩多無敢犯也康熙二十五年夏逢龍

黃岡縣志

卷之十

孝友

六

之叛跳入白雲山泰與陳緯縛之以獻大軍自黃州還
爲泰少以文名年八十三卒子四皆賢季天壽己卯經
魁教授漢陽有文行

殷恭然字叔敬兄弟五人以友愛悅其親力學不倦輯孝
友諸書爲家法其弟卒於湖南時亂離道梗恭然冒死
歸其櫬年七十一卒囊無長物惟家訓格言手授後人
而已子士智諸生

徐光林字雲參親老家貧甚每食進甘旨必審所宜及沒
哀毀骨立廬墓三載康熙己酉舉於鄉出新化教諭遷
寶慶教授齊東知縣所至除蠹徹申倫誼士民懷之

余良銓字衡臣諸生性孝友年七十事母晨昏左右依戀如孩提家貧力致甘旨以奉執喪哀毀撫從子以慈義聞年八十餘卒

羅經邦字五玉諸生性至孝居父喪哀毀盡禮事母婉順頃刻不離年六十餘病劇猶強起言笑慰其母比卒家人議以母棺斂經邦忽起怒視易他棺乃瞑

王道彰字誠思幼孤性篤孝友嗜學博聞尤精易義年十九補弟子員刻志下帷人罕覩其面值戊辰夏逆之亂邑人奔散道彰負其母走數百里匿於白雲山爲人方嚴言行皆宗先正重然諾好施與其自處布衣蔬食淡

如也

曹本英字卓湄諸生以孝聞年二十母柩在堂鄰火及於門急不能從本英撫棺而哭有老僕曹太濡絮入欲覆之出本英哭不應僕亦哭忽風回火滅俱得免時環居百餘家無存者獨樞室如故人以爲孝感

易康時字北司少孤事母孝勤學窮理謹言行以養母志壯有子妻亡遂不娶親執爨澣者二十餘年或勸之曰絮蘆異視恐以此重傷母心也其門人王道明爲序其一門節孝之事

龍仁彰東絃鄉民與弟在旂方耕有虎驟至攫弟踞之仁

彰奮杖擊虎虎傷躍而去在旂得不死爪裂遍體醫者曰以屋茅蟲口嚼敷之仁彰自嚼敷果愈

曹大聲字子先諸生素以孝方稱康熙三年冬父之傳寢疾不能起火發門扉皆熱大聲急和衾挾父走不得路解衣蒙父以出體焦爛越四日死雍正七年

旌表

許顯字諧水與從弟顥勵學爲名諸生後顯母羅病風痺非顯抱持則呻吟故顯十餘年不離床褥母涕泣痾生於面顯常以舌吮之喪後以授徒終老得資輒分給兄弟無所私顥亦友愛撫孤姪如已子

黃岡縣志

卷之十

孝友

三

萬爲境字其容諸生少失怙母蔡守節撫之事母盡孝性仁恕嘗倡助社倉康熙癸酉歲歉鄉鄰賴之

鍾璠字弁生性孝友持家有法四世同居爨者八十餘人循禮推愛鄉黨重之其子孫曾元入庠序列成均者十餘人孫英別有傳

鄧一隆字瑞林家世孝友一隆恭謹勤儉歲時集族男女序世次會講規訓立功過簿以勸懲子弟誦讀至年二十度能學則教之否則使食其力婦女以黎明集治女工財物悉貯公所推一人掌其出入服食無私年老及有疾者別養之八世同居雍正元年

旌表

鄧之璧一隆從子事親孝父病嘗穢焚香誠禱父立愈居喪不飲食或強之遂成瘖未幾卒雍正元年

旌表

呂希煜字茂陽諸生父尙和人稱長者爲清豐知縣剔弊惠民有能聲希煜性至孝隨父任值母喪哀毀骨立扶櫬徒步行三千里哀感路人後值父喪盜夜入其室索財帛無所得煜身衛父棺被傷死雍正八年

旌表

黃漢隆諸生事親孝膂力過人父客死河南漢隆徒步奔

黃岡縣志

卷之十

孝友

三

喪路遠且貧勢不能歸乃以布裹屍盛以大囊負之而走夜則露坐守之越二千餘里及歸葬大哭嘔血死乾隆五年

旌表

胡紹虞字希舜少孤性至孝母病輒晝夜哀涕不食勤湯藥衣不解帶者二年母卒嘔血幾斃廬墓側盡哀其後授生徒諄諄以孝友爲本著有格言怡齋文集子益凡丙辰舉人沔陽學正

雷希聖字育萬諸生父飛僊卒於湖南希聖聞訃往奔會其妻病劇親隣皆勸其緩行終不顧家窘無行貲沿途

哀號所過州縣感其誠皆助之乃歸葬焉年八十餘卒
胡必元字次之事母黃盡孝母素患咳每病輒晝夜不離
側晚年患疽藥餌曲致與其妻同吮之遂愈及沒涕泣
日幾盲殯於庭遇火伏棺號泣不忍去族鄰救棺出始
免子兆桂貢生

張世俊字怙瞻性醇篤與弟世良友愛治家嚴肅有法率
家人耕而食織而衣諸器具自爲之希市者世良以下
稟命而行世俊沒家人稟命於世良今四世同居男婦
數十外內各一人掌之歲時客至士農稱其宜各有主
者訓子孫以敦行篤學爲本世俊子鳳鳴舉人官知府

黃岡縣志

卷之十

孝友

三

別有傳

邱世總字選士諸生性孝友父勃敦行力學雖盛暑必衣
冠嚴冬夜吟不懈著有地輿圖補環山聚奎二文集世
總竭力奉養極得歡心與弟相友愛家有田產悉付於
弟小試屢冠軍教授生徒必先孝弟一時知名士多出
其門子恩榮進士官知府別有傳

袁豐字來章康熙癸酉舉人性孝友方七歲時兄亮外出
不知所向父母思不已豐慰曰兒稍長必尋兄歸越數
年豐乃徒步遠游無可尋者久之至豫之商城過村舍
見門顏數字似其兄問之果得兄遂與俱歸豐著述甚

富授後學多所成就

汪度宏字擴如康熙丙戌進士事祖母以孝聞兄沒姊寡子女皆無依度宏爲撫養而婚嫁之祖姑適陳亦寡歸養三十年無懈色舅沒子女幼亦爲撫養而婚嫁之官保昌知縣有惠聲及歸猶寒素也

葉兆東字位春監生少孤事母孝母病數年侍養無懈及沒廬墓五載遇風雨輒號泣不已

馬鞍山丐者不知其姓名日出乞食必載酒肉慰其母自茹腐且無食然歸則常有喜色傭於人或以簞食貽其母輒喜否則強之不至母老疾常負而遊母亦樂而忘

黃岡縣志

卷之十

孝友

三

其貧雍正五年里有疫其鄰人死經宿而甦曰吾聞冥官哀孝子母老使歸之於是見羣喧送孝子則東鄰丐者也是時丐者病方甦後果終孝養云

朱澤遠字京蒙父昌運康熙戊子舉人官石首教諭澤遠年未弱冠以七藝補弟子員性純孝先隨父任旋因歸里省墓父無疾終聞訃奔喪哀毀骨立後登雍正己酉賢書著有文稿六集詩稿四集經史解四十卷子維辟廩生維倬監生寵錫嶧縣開官

陳大年字士登增生本姓朱明衛千戶寵曾孫也其父以大年教讀自瞻有屯產欲予繼出次子大有大年先意

承志併歸之大有少負異才忽中折屯產無存者大年
又以積脩贖回寡妻幼子賴以存活且教其孤霞普霞
光皆能文霞遠登賢書六上公車大年子若孫皆繼志
欣助云子霞燦邑庠生龍邑增生霞蕙武庠生

張從龍字聯奎以字行性篤孝雖親沒每家奠侍側款語
如生前忌日必變服以泣父次仁詒謀忠厚奎體父志
推惠里黨然必令其可受不欲見德也子青選孫應瑞
俱諸生履恒進士

杜承仕儉勤孝弟其先人咸亨七世同居析爨時八十三
人承仕恪遵遺教子德隆封股療母余氏疾孫希美封

股療叔父德純疾曾孫輔元封股療伯母余氏疾元孫
維學輩皆克敦孝義家政嚴肅男女無惰游者現又五
世同居凡六十餘人

孫世禎諸生天性醇樸事父母以孝聞叔父念綱早逝遺
妻邱及二子禎事邱如已母待二孤如同胞邱以是稱
貞節伯兄世周亦早亡遺二孤禎爲教養俱得成立後
叔父二子皆中折又有遺孤禎鞠育如前

劉本讓廩生章第五子年十五父病親侍湯藥靜夜焚香
求以身代及沒殯歛如禮旣葬廬墓三載母歿亦然忌
日涕淚交下年八十猶如嬰兒嘉慶六年

贈奉直大夫其子孫會元近百人科貢衣冠一時稱盛
嚴文遠康熙間仲兄適黃安路遇賊劫遠赴寨泣求自代
受重傷不避賊感動兄遂獲免

姜師尙吏員待兄弟最友愛弟士泰讀書師尙遵父命多
所推讓以成就之卒年八十餘子周亦考職吏員孫維
寰維寬貢生維寅監生

嚴文斌增生與貢生嚴文乾昆弟也事母皆以孝聞有館
在居側晨昏定省如禮母歿殯葬畢兩人足不出館闕
者三年子承伊承臯承玉俱諸生

左飛鳴字雲衢邑增生少師事秦能泗喜高澹之文性鈍

師弗善也父給事縣庭因公累逮獄飛鳴倉皇隨往乞
以身代獄卒呵之飛鳴倚狴戶哭竟日勺飲不入口卒
感動誓許將護乃父因扶出未數武慟絕於地卒大驚
復扶入見其父乃撫銀鐺大號同繫者皆泣下獄官聞
憐而加禮脫其父械未幾父病縣卒允其代飛鳴在獄
志氣奮發日構文一篇初運思如繭抽旣乃泉湧秦師
大駭異以爲有神助月餘縣令提比飛鳴瀝情泣訴不
激不悚宰察其貌曰孝子也奇士也釋之旋冠縣試入
邑庠父後嬰沉疴服勤勞瘁歷十數年視友門生憂其
貧難備養往往探其父之所欲婉辭餽遺飛鳴曰友生

錫類之仁我不敢違平生借助止此年六十九卒

沈啟洛字冠山廩生父太占輕財重義洛事親以孝聞慷慨交遊亦如其父著有竹軒詩文麗江梅坪鷄山谷遊記樊上吟

周漢德漢興家金鷄山側里人皆稱其孝友與五齡母患目疾倚懷舐以舌經月愈父病與私禱於神割股救甦久之父母繼亡哀毀廬墓六年始歸德歲貢生痛弟割股事因葉古之敦孝者爲孝行錄昆季凡五人怡怡終身興卒年七十三猶號父母數聲而歿德子逢烈庠生嚴文凱字維野少失怙恃事兄嫂惟謹兄久客揚州凱年

黃岡縣志

卷之十

孝友

三

十四步走尋歸初析爨時正貧後業漸裕請合之有弟年七十卒哭之極慟凱卒年八十二子承錦承洛孫家璧恭皆諸生家珩舉人

萬廷奎壽祖子性孝友敦節義又好博涉爲王耘渠高足弟廷璧廷翼皆承其教成孝廉著有可棲軒詩文集子希良恩貢生著有輕舫詩集

胡宗返庶安鄉人父士才先沒事母唐柔色以養母疾篤割股以進不克救執紼時掖者觸其創血流殷緘人始知之初貧困不妄取中歲服賈漸饒歲饑鬻米貸里人水漲餽餼待遠客多所推解易簣時惟屬子孫孝友配

徐氏稱偕孝享年百有一歲生五子啟華文盛文學文炳文郁皆承父志文學文炳尤繼孝父病危各禱神割股不謀而同學子妖聘媳徐來守貞學病徐亦割股療舅其事三世凡四見焉至道光八年長孫廷瑞年過六十曾元輩百餘人五世共爨大憲聞於

朝

勅賜建坊曰孝義之門先是孫玉森中戊寅鄉榜曾孫飛雄辛巳舉孝廉方正曾孫錫渠食餼邑庠人皆以爲淳行之報云

張錦明七歲失恃有弟一父繼娶李又生二子李異視前

黃岡縣志

卷之十

孝友

三七

子每虐以苦難事明聽使無慟妻李亦體夫志父卒諸弟析居繼母養多缺明奉事如初常病危明禱神割股以進母病痊遂大悔諸弟貧困明不問同母異母皆竭力護持之卒年八十二子世福貢生孫昌佩州同昌傑布理問

萬希中與弟希和鶚諸生家居養親一室雍如也父年八十餘常患癰日夜輪流吮洗不假他手執喪廬墓三年同讀禮屏外事兩弟卒營兆令寬謂吾兄弟三人生死不離云

賀鵬翥諸生天性篤厚客於外歸則依依親側婉孌如嬰

兒撫諸弟友愛在館爨澣必親生徒或止之曰吾諸弟任勞忍獨逸耶妹嫁余氏早寡鵬翥子恤備至清節如冰得兄教者居多

張偉度太學生事父母極孝壯買漢羸徐悉以備甘旨召之不避風雨幾溺於江或咎之曰父命可艱險遲耶叔母孀久別居奉養無缺羣從弟兄如一體焉

王朝仁下伍重鄉民也父早喪兄遷他邑母戚氏瞽仁傭工爲活奉養不缺每應人役早午必歸備再食之需母病仁割股救甦凡六年始歿在喪衰經不去身

周鳴鳳字二于歲貢生忠烈公裔曾祖始由陽邏遷郡城

家漸落父常遠買鳴鳳刻厲讀書奉母教至虔晚乃游庠食餼教讀垂五十年及門之士類皆以讀書敦品相砥礪云子慕昌績學未遇孫繩祖邑庠生

錢周德號蘭臺乾隆戊申舉人援例官中書性篤孝母早卒繼母性暴戾虐使之德悉忍受且奉事惟謹其母卒

感悟

杜炎于皇姪孫也性醇篤事母周以孝聞待兄弟極友愛家有湖分炎悉讓與姪鄉鄰義之卒年七十四

李學珠蘆洲鄉民乾隆三十二年大水珠攜已子並兄子乘船遭大風勢不能兩全珠乃棄子存姪以全兒祀

於正淳字魯彌歲貢生明通政倫之裔也游鄉前輩朱日
濬門孝弟端方年近百家教最嚴子萬承事父色養母
早卒每日暮必往省墓凡十餘年著有孝友錄年七十
入先父卒萬承次子長源乾隆庚辰舉人母病三載躬
侍湯藥母沒水漿不入口瀕死者四遂病噎啜粥以生
後任宣恩學博聞兄病解組歸長源次子象模郡廩生
親卒亦三載守殯側先是長源病疽子象椿日吮以口
卒不起椿時年二十九亦廬墓數載嘔血卒

汪應蛟廩生性孝友父開運增生病草時應蛟請將腴產
分給兩弟已得甚瘠且少父大喜父歿蛟獨養母後母

歿將分授之產鬻以殯葬不累兩弟子兆木諸生

龍逢春事親孝至老不怠父母年踰九十春年已七十父
病痿七年湯藥飲食盥溺春必親執其役母病亦然及
歿廬墓三載

胡文崎事繼母李孝李年九十風痺不能起崎晨夕將護
閱四年母沒廬墓三載兄無嗣崎以其長子爲嗣卒年
七十子世理監生世法從九孝友均如其父孫必楠舉
人必杞必本必槐必楨俱貢生必本別有傳

徐世澤孝友性成髫齡時父客遠方絕音耗者十餘年世
澤言之輒涕泣家貧母老囑兄奉母澤行丐至川年餘

竟得見父嚴冬扶父歸風雪中艱險自如歸後奉養罔缺以勞傳一卒兄鳳翔憫之爲立傳

萬鳳彩監生性孝友父早世事母婉順同胞弟女弟共八人友愛悉至筦家政四十餘年尺布斗粟無私孫裕臨貢生

王廣文監生性至孝父病躬奉湯藥衣不解帶者六閱月子正澹監生亦孝友居父喪哀毀骨立克盡禮制事母病亦如事父同里居雍姓童婚構訟斷離澹捐百金訟冤雪離者復合

商一治字泰然事親至孝年五十母黃氏病癯素不飲葯

黃岡縣志

卷之十

孝友

四

跪以進拒益甚因齋禱於華陀神日三次母病尋愈享壽九十有二

夏傳鼎增生父沒居喪三年足不出戶子啟連啟遠啟迴俱庠生

靖克純性孝友父沒結廬守墓母壽登九旬得危疾純祝天請代疾輒愈乾隆元年舉孝廉方正子本荃廷景本茂振揚俱諸生

謝志煌宦蹟加恩裔孫性孝友父方楚廩生晚年病瘋手足拘攣時煌母早歿凡興居飲食皆煌與其兄庠生志烈扶抱哺食之溺器廁諭躬親滌洗嗣以家貧不給志

烈仍就館奉養前後十五年勞穢之事煌獨任焉

萬希科乾隆丁酉拔貢登庚子賢書官荊州教授性篤孝力學不輟與伯兄希良仲兄希成一門相師友至老不衰在官時因公晉省聞仲兄訃遽歸不及稟上憲也後上游以其有吏才保舉知縣辭不就尋以病歸

姜聞韜遺腹生總角時奉父柩歸窆雨不克葬韜伏柩側號泣竟日以痛父故事母亦如其父鄉里多稱之子玉成布經歷玉鳴篤行知醫玉衡縣丞若熊郡庠生母汪病篤熊嘗藥醫云難救而竟得痊奉養又二十年人以爲孝感云子炳芳邑庠生績學早逝玉鳴子炳文舉人

黃岡縣志

卷之十

孝友

四

齊禮廩生少孤貧事母極孝家居授徒不忍須臾離色笑有遠道豐修聘延者力謝之年五十後候母卧起身溫衣被母年九十卒哀毀如孺子焉

熊世淳邑增生事親以孝稱父没大母高年事之尤謹與弟世瀚共貲財孫曾輩尙未析居皆其遺訓也

謝志烜歲貢生惠元孫至性惇篤事本生祖父母曲全孝道母氏靖嘗刲股療舅疾烜心痛之終身不忍言家中落藉授徒修脯以供甘旨至老弗倦卒年八十六子莖舉人安徽知縣加知州銜孫清臣安徽候補府經歷方念宗從九品性純篤事親孝居喪哀毀盡禮與諸兄相

友愛晚濟人以岐黃術子二長同春嫡出次鏞優貢生同春亦以孝稱鏞幼喪母春視之如胞與妻黃氏撫之成立

謝鴻恩性仁厚父患痰疾卧床不起恩日夕哺授飲食扶持寢興溲便手爲掬滌凡十有一年無不感嘆比父卒哀毀如禮築室墓旁暮夜號泣哀動路人乾隆元年

旌表建坊

陶之龍監生少事親以孝聞親沒廬墓枕塊真誠罔懈時大父尙存飲食醫葯必躬必親撫弱弟成立尤篤友恭子行簡占魁俱武庠姪欽由郡庠議叙衛千總開甲武

黃岡縣志

卷之十

孝友

四

進士官提塘

熊文綱諸生性至孝力貧自食事父母曲意承歡兄早亡視諸姪如已出教之成立田產腴者悉讓之嘉慶戊午恩賜副榜卒年九十三次子象升諸生

范綸性篤孝友父病劇綸泣禱於東嶽神願減已算增父算父病果愈後十年父沒綸結廬墓側終三年喪與兩弟共財子孫遵行三世綸壽九十無疾卒

熊遠道監生弟遠明母所鍾愛早沒遺孤二道飲食教誨曲體母志母患痿朝夕扶持污垢皆親滌除年七十先母卒

張朝棟馬家潭農民也父某客死鄖西棟行乞至鄖得瘞所傭力其地三年以傭貲作扶櫬費旅店每不納宿依櫬野棲號泣達旦卒歸父骨里人助葬之

楊有山年二十與母霍氏弟玉鱗福蔭渡鮑湖大風覆舟有山援舟起不見母弟入水求之不得大哭復入水求之遂不起後得屍猶以一手挽母

陳珽事親孝親沒泣慕無閒從父士俊無子珽承順如事父沒後喪葬盡禮

洪志鵬監生性謹篤事父母克孝事繼母亦然年三十綜理諸從家政內外百餘人無間言析箸均財絲毫不苟

黃岡縣志

卷之十

孝友

四

年六十偕季弟築室於舊居北一室怡怡門庭祥靄生平敦信義好推解無疾言遽色鄉里之譽歸焉子恩治候選縣丞

曾輝彩監生兄弟七人同財共爨至食指五六百猶子鵬進士官知縣

鄉民雍紹先性摯孝父母老婉順如孺子時待兄弟更極友愛

胡其蔚家故貧授徒以養母病篤舂股以進母遂愈後登嘉慶庚午鄉榜衆皆以爲孝之報云

童守和太學生孝事寡母與兄弟相友愛中歲分爨時田

廬美者推讓弟兄其子弟亦皆敦睦云

鄉民周際元家貧苦事繼母史竭力供甘旨妻邵亦禮夫志忍饑餓而奉養罔缺云

萬鼎芬副榜貢生性孝友逮事大母隨父母後奉起居惟謹與二兄尤敦手足誼子家福亦孝友弱冠成進士入詞館假歸省親執父喪過哀成疾時母亦病福力疾侍湯藥母痊而已疾大作卒年二十四囑家人以麻衣斂宗人憐之

雷懋德監生父早逝事母林至孝母卒哀毀幾傷性弟懋仁增生與兄同居至老敬愛倍篤子時敬時敏俱庠生

黃岡縣志

卷之十

孝友

四

羅之品中和鄉人總角時母患瘵親奉湯藥父促就塾晨昏偶歸母食則食否則忍饑而往母察知之先以盂箸置寢側給以食訖品乃食逮母卒事繼母亦以孝聞靖厚炳監生性淳謹事父母極孝父病癱口吮之母患病親嘗穢均獲痊仲兄嫂早逝遺孤華蕙蕙教養兼至遺亡又遺孤二歲撫之成立

魏廷增字方至附貢生先世本姓雷至性純篤父病廷增躬侍湯藥衣不解帶者累月父沒喪葬如禮中年奉母尤能色養凡施與之事感曲承母志邑有興作廷增必倡捐嘉慶丁巳以孝廉方正舉辭不就非矯情恐貽倚

問望也子道鎮俱監生鈗庠生其同族壩字伯昌貢生亦以孝友稱而性好善乾隆中脩擴郡學壩經營八年至傾其家三子皆入成均孫正復曾孫光普俱諸生奚光煥號寅齋郡庠生性至孝嘗侍母疾憂思累日醫藥多不驗夜半忽假寐若有人授以方醒卽照方和藥母疾竟瘳逾年乃卒猶時時爲子第言以未能爲母延年爲恨平居嚴正自持與物無忤雖臧獲輩未嘗以聲色加之罔不愛敬易簣時謂諸子曰我每見士大夫於親沒時自爲行述廣乞銘傳欲榮其親實誣甚我生平無可述亦無可傳爾輩僥倖成名皆祖人積累所致甚不

欲爾輩效尤也人聞其言咸服其誠樸而制行仁孝肫摯類如此子先凱進士官中書先悌舉人官知縣孫德琇直隸候補臬司獄

倪章福長圻墾農家子力田養親曲盡孝養父母歿廬墓凡六年隆冬僵卧雪中感母魂若爲蓋覆然醒哭一村不忍聞其聲斬水陳脩撰沆爲其聘孀母劉貞女作節孝行併紀其事

胡必本號蒙山貢生事父母曲盡孝養母晚嬰危疾奉湯藥無倦容友愛兄弟推讓產業一無所較視羣從如一體有緩急咸賴焉族故無祠本倡捐創建並刊規以約

族人至今猶其遵之卒年六十子二華潤候選訓導華
海庠生孫七同治庠生

汪謙號南亭嘉慶庚申舉人性至孝友父沒母年七十餘
不赴公車菽水承歡晏如也著有綱鑑會纂補正母年
九十三日見元孫子兆年監生兆雲進士曾孫鑾諸生
謙卒年九十一亦日見元孫

陳履謙貢生祖啟華父貴起家勤儉世篤孝友至謙時男
婦長幼凡百五十餘人謙與弟履亨督率之共敦雍睦
建支祠延師課子孫之英敏者或改業則商於外均恪
守家訓家漸饒凡推解之事無吝色亦無德色里人多

黃岡縣志

卷之十

孝友

四六

稱之且爲聯名舉報王賀兩學使先後以敦行不怠義
門高範額獎之洎道光十二年七世同居孫會林立有
司太吏以聞於

朝

恩勅建坊曰孝義之門子鳳從子大易輔國天驥俱武庠連
國學生

張品邑庠生幼失怙事母以孝聞而伯仲錫類推解之事
尤多子六長兆澤武舉次鴻邑廩生兆桂武庠生

黃自宸字楓溪歲貢生至性純篤事父與繼母以孝稱五
世同居其再從父與之年相若宸事之恭謹與羣從昆

弟尤悖友愛內外無間言辛卯脩邑志宸經理井然平生文行著稱晚以明經終老而意致淡如也從子引孚郡庠生

許希曾字省齋議叙鹽知事生員文達子祖母殷母李俱以苦節旌見列女傳希曾幼逮事會祖職員景道恪遵家教事祖母及母以孝稱長肩家政於族之貧乏者歲時皆酌爲周給族舊有祠希曾力新之道光辛卯大水民艱食平糶倉穀希曾代民償一日價無德色復捐錢百萬助官糞賑皆錫類以推與也子汝齡庠生汝鳳從九品汝梅廩生汝鐸監生議叙八品汝勳監生

黃岡縣志

卷之十

孝友

四七

汪洋灝事親以孝聞父病篤灝跪侍湯藥衣不解帶逮父沒喪葬皆如禮解元郭維本爲之立傳

呂德明庠生事親孝親沒哀毀骨立廬墓經年其他若貢生葉兆甲汪延隆靖本信余恩深李方鄂黃章品陳殿魁夏傳爵熊世濂皆邑之以廬墓稱者

割股

附按舊志載割股有專條今因採訪甚夥情節少異者仍舊餘悉彙載於後

明

劉思敬割股救母病愈巡按汪承詔匾旌之

彭克永父扶冲病劇克永割股餌之病愈提學道王永祚匾旌之

國朝

陶之伊康熙二年父君重病篤夜焚香禱祖願以身代因

割股進之父病遂痊里人上其事知縣徐籀匾旌之

楊士松早失怙事母孝養備至母常患疽其妻陳吮之母

夜苦足冷陳抱溫之母病劇割股進之尋愈

張有餘事親孝父廷榮病篤割股以進病遂愈其妻嚴氏

亦以此救其姑其後仲子華國子婦萬氏孫錦煌皆割

股此事張門三世凡六見焉

劉宗向母汪病篤宗向湯藥親嘗旋乃齋戒割股進之母

病痊

黃岡縣志

卷之十

孝友

四六

吳太治父宏功病太治悲泣私禱願以身代後病劇引刀

割股以進父病遂愈

龍肇亨父士通病劇肇亨割左股啖之病以愈事在乾隆

甲子年

程如會家貧孝事繼母廖廖病如會割股進之病因愈又

有趙國祚劉世爵林宜賢陶克定亦以割股稱

姚啟順性篤孝家貧肩輿以供親膳父病割股以進遂痊

母病復斷指和藥母亦瘳

吳緒溢緒春母久病不愈兄割左股弟割右股以進母得

無恙

程光環父病割股救愈後祖母病亦如之

奚紹信父病割左股以療母病復割右股父母皆得延年

其次孫光壁事叔父如事其父叔父病劇光壁割股進

疾遂瘳其弟東晟亦割股救母病邑人皆稱為孝義之

門

揭鳴九性篤孝父疾割股以進遂愈後母歿廬墓期年

朱彩五下伍重鄉縫工也父病割股救療父歿奉母彌摯

或食以佳味必歸獻母母歿廬墓三年

胡萬年六歲喪母繼母張生弟定秦宦京邸張在家病萬

年割股以進果愈

黃岡縣志

卷之十

孝友

四九

余木匠本姓藍名世誠樊港人也母病割胸左肉一臠以

進不出血母病遂瘳自是雖酷暑不解衣母故每除夜

必往守墓竟夕悲號

邵際連母病連割股療之父患穢疾連口吸舌舐得延年

餘連妻吳亦善承夫志以孝聞連後入邑庠

王出球祖父病球割股奉之而愈他如甄光煇鍾大用則

為祖母王崇禮則為叔父夏立山則為兄皆以割股稱

沈敦彝 洪志道 黃元亨 包祖樂 熊會清

劉仁覆 左宇發 杜英萬 杜兆瑞 李在寬

尹萬書 夏隆瑚 呂麟玉 邵正翥 舒中烙

舒光澤

汪引恩

邵正傑

以上均為父割股

盧占鰲

陳有為

雷生煊

周奇光

舒謙受

胡之洙

張承珍

鄭宗海

宋天德

靖華春

杜希科

王士珩

蔡茂元

劉三槐

鄭長青

王紹貴

王廷相

周祖興

李啟勝

張士雄

曾德鰲

李運乾

劉泰銘

孫克詮

陳國舉

胡士傑

龍繼先

汪世悌

鄒懷爵

王緒勝

張正祿

何在朝

曹宗漢

祝光智

邵鵬泰

彭萬年

童士信

張全宗

邵際鏜

單浚

周震星

以上均為母割股

黃岡縣志

卷之十

孝友

辛

百歲翁暨屢世同居

附

屠應蛟年百歲見篤行傳

胡來通年百歲見隱逸傳

於心寶字正伯諸生方正嚴重人稱長者年百歲子弟恂

謹遵其訓孫萬震康熙庚子舉人

洪世永字清渠諸生壽百歲聰明康健無疾而終

袁文衡年百歲見于清端政書

藍有德五世同堂見省志

監生萬廷德字據安性好遊乾隆甲申年七十餘遊揚州

聖駕南巡廷德迎拜道左

恩賞八品頂戴黃絹一幅養老銀牌一面卒年九十八

吳大裕五世同居嘉慶二年由學詳請 旌獎子之任歲

貢生孫思弼諸生

劉學開六世同居道光六年詳請學憲額獎

劉學剛五世同居道光九年詳請學憲額獎

邱安衡五世同居道光十二年詳請學憲額獎

廖澤厚年九十六歲五世同堂子四孫十曾孫十一元孫

二道光二十八年詳請學憲額獎

沈家琮年百歲道光二十八年詳請學憲額獎子之銓歲

貢生之銓邑增生孫光灃諸生

黃岡縣志

卷之十

孝友

五二



黃岡縣志卷之十終